

**Uunga siunnersuut: Utoqqaat Illersuisuat pillugu Inatsisartut inatsisaannik
allannguneq pillugu Inatsisartut inatsisaat**

(Isumaginninnermut Sulisoqarnermullu Naalakkersuisoq)

pillugu

Ilaqtariinnermut Peqqissutsimullu Ataatsimiititaliap

siunnersuutip aappassaaneerpeqarneranut

ISUMALIUTISSIISSUTAA

Ataatsimiititaliaq suliarinninnermini uku ilaasortarai:

Inatsisartunut ilaasortaq Agathe Fontain, Inuit Ataqtigiit, siulittaasoq
Inatsisartunut ilaasortaq Anna Wangenheim, Demokraatit, siulittaasup tullia
Inatsisartunut ilaasortaq Mikivsuk Thomassen, Inuit Ataqtigiit
Inatsisartunut ilaasortaq Knud Mathiassen, Inuit Ataqtigiit
Inatsisartunut ilaasortaq Mette Arge-Hammeken, Naleraq
Inatsisartunut ilaasortaq Jess Svane, Siumut
Inatsisartunut ilaasortaq Mala Høy Kukó, Siumut

UKA2021-imi oktoberip 6.-ani 2021-imi siullermeerinerup kingorna siunnersuut
ataatsimiititaliap misissorpaa.

1. Siunnersuutip imarisaa siunertaalu

Utoqqaat Illersuisuat pillugu Inatsisartut inatsisaat pillugu allannguutissatut siunnersuummik
Isumaginninnermut Sulisoqarnermullu Naalakkersuisoq saqqummiussaqqarpoq, marlunnik
allannguuteqarfiussusaq. Allannguutissaq siulleq tassaavoq, allattoqarfiup Isumaginninnermut
Aqutsisoqarfimmit isumagineqarunnaarluni namminerisaminilli aamma kiffaangissuseqarluni
allattoqarfiulernissaa. Allannguutissap aappa tassaavoq, allattoqarfiup inissisimanerata
nalilersorneqartarnissaa pillugu piumasaqaatip atorunnaarsinneqarnissaa.

2. Siunnersuutip Inatsisartunit siullermeerneqarnera

Siunnersuut partiinit amerlanernit tapersorsorluarneqarpoq, pingaartumik Utoqqaat Illersuisuat naalakkersuinikkut suliaqartunit attuumassuteqanngitsumik allattoqarfeqalernissaminut periarfissaqalermat. Demokraatit allannguutissatut siunnersuummik saqqummiussaqaqput Siumumiillu qinnutigineqarluni ataatsimiititaliap suliarinninneranut atatillugu Utoqqaat Illersuisuata tassungalu atasumik allattoqarfiup Nuup avataanut inissinneqarsinnaanera isummerfigineqassasoq.

3. Tusarniaanermi akissuteqaat

Tusarniaanermi akissuteqaatit tunniunneqartut inatsisissatut siunnersuummut ilanngussatut ilanngunneqarput, taamaalilluni Inatsisartut Siulittaasoqarfiata ilusiliinissamut piumasaqaataanut naapertuullutik.

4. Siunnersuutip aningaasatigut kingunerisassai

Siunnersuutip piviusunngortinneqarnissaanut aningaasatigut kingunerisassai siunnersuummi nalinginnaasumik oqaaseqaatini allaaserineqarput. Tassani allassimavoq, AIS2022-imut aamma AIS2023-imut Utoqqaat Illersuisuat qitiusumik allaffeqarfiup avataani inimik attartornissamut, sulisumik allattoqarfiup ulluinnarni ingerlanneqarnissaanut atorfinitsitsinissamut aammalu killilikkamik piffissalerlugu sulisumik ilisimasalimmik pequtinillu pisinissamut il.il. aningaasanik imikkoortitsisoqarsimasoq. Saqqummiunneqartut tunngavigalugit allatut naliliinissaminut ataatsimiititaliaq pissutissaqanngilaq.

5. Ataatsimiititaliap siunnersuummik suliarinninnera

Aallarniutigalugu Utoqqaat Illersuisuat pillugu inatsisissatut siunnersuut pillugu isumaliutissiissut UKA2019-imeersumi imm. 146 Ilaqutariinnermut Peqqissutsimullu Ataatsimiititaliap innersuussutigissavaa. Tassani allassimavoq, Utoqqaat Illersuisuannik pilersitsinnermut atatillugu attuumassuteqanngitsumik allattoqarfeqaruni pitsaanerpaassasoq. Taamaattumik inatsimmik taassuminnga allannguinnermi Utoqqaat Illersuisuat namminerisaminik attuumassuteqanngitsumik allattoqarfeqalernissaa ataatsimiititaliap iluaraa.

5.1 Isumaginninnermut Suliffeqarnermullu Naalakkersuisumik ilisimatitsiffiusumik ataatsimeeqateqarneq

Ataatsimiititaliap siunnersuummik suliaqarnerminut atatillugu Isumaginninnermut Suliffeqarnermullu Naalakkersuisumik ilisimatitsiffiusumik ataatsimiititaliaq ataatsimeeqateqarpoq. Utoqqaat Illersuisuat pillugu inatsisip allanngortinneqarnissaa pillugu siunnersuutigineqartup itisiliiffigineqarnerata saniatigut Utoqqarnut Periusissiap killiffia UKA2021-imi saqqummiunneqartussaqaq pingaarnertut ataatsimiititaliamut nassuiaatigineqarpoq. Atortussat isumaliutissiissummut matumunnga ilanngussatut ilanngunneqarput.

5.2 Allanguutissatut siunnersuut

Tulliuttumi allanguutissatut siunnersuut Demokratinit saqqummiunneqartoq ataatsimiititaliamit ima isumaqarfigineqarpoq. Allanguutissatut siunnersuut ima allassimavoq:

” Inatsisartut aaliangissasut, Naalakkersuisut peqquneqassasut oqaaseqartartut ataatsimoortinnerisigut ataatsimut allaffeqartumik inuttut pisinnaatitaaffiit pillugit siunnersuisoqatigiittut ittumik pilersitsisinnaanermut pitsaaqutit akornutissallu misissoqqullugit”.

Allanguutissatut siunnersuutip imarisaani illersuisoqarfiit tamarmik pineqartut ataatsimiititaliaq naliliivoq, taamaattumillu Utoqqaat Illersuisuat pillugu inatsisip maannakkut allanngortinniarneqartup avataaniilluni.

5.3 Utoqqaat Illersuisoqarfiata allattoqarfiullu Nuup avataanut nuunneqarsinnaaneranut periarfissat

Utoqqaat Illersuisuata aammalu allattoqarfiup Nuup avataani illoqarfimmut allamut nuunneqarsinnaanerannut periarfissaq pillugu kissaatigineqartoq ataatsimiititaliamit malittarineqarumavoq. Tusarniaanermi akissutigineqartoq Qeqqata Kommunanit tunniunneqartoq Utoqqaat Illersuisuat tassungalu atasoq allattoqarfiup Nuup avataanut illoqarfimmut allamut inissinneqarsinnaanera Naalakkersuisunit eqqarsaatigineqarnissaa tassunga atatillugu ataatsimiititaliamit oqaatigineqassaaq. Tamatumunnga Naalakkersuisut akipput Utoqqaat Illersuisuata nammineq pisinnaatitaaffigigaa allattoqarfiup sumi inissisimanissaa aalajangissallugu.

6. Ataatsimiititaliap inassuteqaatai

- Ataatsimiititaliami amerlanerussuteqartut Inuit Ataqtigiiinneersut, Naleqqameersut aammalu Siumumeersut siunnersuutigineqartup akuersissutigineqarnissaa inassutigaat
- Ataatsimiititaliami ikinnerussuteqartut Demokratineersut ima oqaaseqaateqarput:

Utoqqaat Illersuisuannik pilersitsinissamut aallaqqaaterpiaaniilli Demokratit akerliupput, taamaattumik Inatsimmi allannguinnissamut Naalakkersuisut siunnersuutaannut isumaqataanngilagut. Aningaasat qineqqusaarnermi neriorsuutigisimasatsinnut atorneqassasut assaat nillertuniit assannut kissalaartunut nuunneqarunik angusaqarnerussasugut isumaqarpugut. Assaat kissalaartut toqqaannartumik utoqqaat sullinneqarnerini uffarneqarnissamik, nerisaqartinneqarnissamik isumassuinermillu ikiorneqarnissamik pisariaqartitsisunut, inuunerup pitsaassusaanik toqqaannartumik siuarsaasussamik.

Inatsisartut Ombudsmandeqarpugut, utoqqaat atugaannut tunngatillugu sullissinerit assigiinngitsut annerusumik minnerusumilluunniit isorinnittartumik, uanilu isumaqarpugut, aningaasat kukkunernik amigaatinillu saqqummersoqarsinnaanerani pinaveersaartitsinerimut, utoqqaat utoqqalinerminni naleqarnerusumik utoqqalisarnissaat qulakkeerneqarsinnaaqullugu atorneqartariaqartut matumani aamma isumaqarpugut, Taamatuttaaq Utoqqaat Oqaaseqartartuata namminerisaminik allaffissaanik pilersitsinikkut arlaannaannulluunniit partiinut attuumassuteqannginnissaanik qulakkeerinninniarniq, taamatut arlaannaannulluunniit partiinut attuumassuteqannginnissaanik qulakkeerinnissinnaaneq assersuutigalugu Utoqqaat Illersuisuannik Inatsisartunit toqqagaanissaa Naalakkersuisunit toqqagaannginnissaanik qulakkeernittoqarsinnaanerani Naalakkersuisut nassuiaatigisaat isumaqatiginngilarput. Utoqqaat Illersuisuata tunuartup ernumassutigisai pimoorullugit tiguneqarsimanngitsut ernumassutigaarput, taassumammi isummanik ineriartortitsinerimi suleqateqarnissaq pisariaqartinneqartoq ersarissumik oqaatigimmagu, matumanimi allannguutissatut siunnersuutigisatsinni qulakkeerneqarsinnaammat. Naatsumik oqaatigalugu utoqqarnut pitsanngorsaanissaagaluit piviusut iluarseqqaarnagit allaffissornerup allaffissornerujussuullu Naalakkersuisunit annertunerulersinniarneqarnera isumaqatiginngilarput

- Siunissami Utoqqaat Illersuisuata allattoqarfissaatalu Nuup avataanut illoqarfimmut allamut inissinneqarsinnaaneranut periarfissaq eqqumaffigeqqullugu ataatsimiititaliamit Naalakkersuisut kaammattorpaat.

Taamatut oqaaseqarluni isumaliutissiisummilu allassimasutut paasinnilluni matumuuna siunnersuut ataatsimiititaliap aappassaaniigassanngortippaa.

Ateq
Siulittaasoq
Agathe Fontain

Ateq
Siulittaasup tullia
Anna Wangenheim

Mikivusuk Thomassen

Knud Mathiasen

Mette-Arge Hammeken

Jess Svane

Mala Høy Kukó